



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ԲՈՂՈՔԱՐԿՄԱՆ ԽՈՐՀՈՐԴ

ք. Երևան

11.09.2017թ.

Ո Ր Ո Շ ՈՒ Մ ՀՀ գնումների բողոքարկման խորհրդի թիվ ԳԲԽ-ԷՍ-2017/33

ՀՀ գնումների բողոքարկման խորհուրդը (այսուհետ՝ նաև Խորհուրդ) քննելով «Ինվուդ» ՍՊԸ-ի 21.08.2017թ. ներկայացրած բողոքը (այսուհետ՝ նաև Բողոք) և կից նյութերը, պարզեց հետևյալը.

1. «Ինվուդ» ՍՊԸ-ի ներկայացրած փաստերը, հիմնավորումները և պահանջը.

«Ինվուդ» ՍՊԸ-ն (այսուհետ՝ նաև Ընկերություն) ՀՀ գնումների բողոքարկման խորհրդին 21.08.2017թ. ներկայացրել է բողոք, որով հայտնել էր հետևյալը.

««Ինվուդ» ՍՊԸ-ն մասնակցել է Երևանի քաղաքապետարանի կողմից կազմակերպված «ԵԲ-ԳՀԱՊՁԲ-17/4» ծածկագրով գնման ընթացակարգին (այսուհետև՝ Ընթացակարգ):

Երևանի քաղաքապետարանի կողմից կազմակերպված «ԵԲ-ԳՀԱՊՁԲ-17/4» ծածկագրով գնման ընթացակարգի գնահատող հանձնաժողովի 2017թ. օգոստոսի 3-ին ժամը 11:45-ին կայացած նիստի թիվ 4 արձանագրության 2-րդ կետի համաձայն՝ «Ինվուդ» ՍՊԸ-ի հայտը գնահատել է բավարար (համապատասխանում է ընթացակարգի հարվերով սահմանված պահանջներին), իսկ 3-րդ կետի համաձայն՝ «Ինվուդ» ՍՊԸ-ն ճանաչվել է 9-րդ չափաբաժնի մասով առաջին տեղ զբաղեցնող մասնակից:

Երևանի քաղաքապետարանի կողմից 14.08.2017թ. Ընկերությանը բանավոր տեղեկացրել են, որ մեր հայտը մերժվել է՝ չներկայացնելով Ընթացակարգի գնահատող հանձնաժողովի տվյալ արձանագրությունը:»:

Որպես բողոքի իրավական հիմքեր և հիմնավորումներ՝ Ընկերությունը նշել է հետևյալը.

«Գնումների մասին» ՀՀ օրենքի (ուժի մեջ է մտել 25.04.2017թ., այսուհետ՝ Օրենք) 46-րդ հոդվածի 1-ին մասի համաձայն՝ յուրաքանչյուր անձ իրավունք ունի բողոքարկելու պատվիրատուի, գնահատող հանձնաժողովի և գնումների բողոքարկման խորհրդի գործողությունները (անգործությունը) և որոշումները:

Օրենքի 34-րդ հոդվածի 1-ին մասի համաձայն՝ հայտերը գնահատվում են հրավերով սահմանված կարգով: Բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:

ՀՀ կառավարության 04.05.2017թ. N526-Ն որոշմամբ հաստատված «Գնումների գործընթացի կազմակերպման» կարգի 41-րդ կետի համաձայն՝ եթե հայտերի բացման նիստի ընթացքում իրականացված գնահատման արդյունքում մասնակցի հայտում արձանագրվում են անհամապատասխանություններ՝ հրավերի պահանջների նկատմամբ, բացառությամբ այն դեպքերի, երբ հայտում բացակայում է գնային առաջարկը կամ հայտի ապահովումը, կամ գնային առաջարկը, կամ հայտի ապահովումը ներկայացված է հրավերի պահանջներին անհամապատասխան, ապա հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին էլեկտրոնային եղանակով տեղեկացնում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը»:

Ելնելով վերոգրյալից՝ Ընկերությունը գտնում է, որ «Ինվուդ» ՍՊԸ-ի կողմից ներկայացված հայտը համապատասխանում է ընթացակարգի հրավերի պահանջներին:

Ընկերությունը Խորհրդին ներկայացված բողոքով խնդրել է.

1. Կիրառել ժամանակավոր միջոց՝ կասեցնել պատվիրատուի կամ գնահատող հանձնաժողովի կողմից «ԵՔ-ԳՀԱՊՁԲ-17/4» ծածկագրով գնման ընթացակարգի շրջանականերում կայացված ցանկացած գործողություն և որոշման իրականացում:

2. Այլ մասնակցի հետ պայմանագիր կնքելու դեպքում ընթացակարգը հայտարարել ապօրինի:

Ընկերության ներկայացուցիչը 24.08.2017թ. Խորհրդում կայացած նիստի ժամանակ խնդրեց Ընկերության կողմից 21.08.2017թ. ներկայացված բողոքի պահանջը լրացնել հետևյալ բովանդակությամբ՝ դադարեցնել «ԵՔ-ԳՀԱՊՁԲ-17/4» ծածկագրով գնման ընթացակարգի գնահատող հանձնաժողովի «Ինվուդ» ՍՊԸ-ի հայտը մերժելու մասին որոշումը:

Խորհրդում բողոքի քննության նպատակով տեղի ունեցած նիստերին մասնակցում էր «Ինվուդ» ՍՊԸ-ի տնօրեն Արմեն Ժամկոչյանը:

2. Երևանի քաղաքապետարանի կողմից բողոքի վերաբերյալ ներկայացված փաստերը, հիմնավորումները և դիրքորոշումը.

Երևանի քաղաքապետարանը (այսուհետ՝ նաև Պատվիրատու) 24.08.2017թ. թիվ 02/61-52538 գրությամբ «Ինվուդ» ՍՊԸ-ի կողմից 21.08.2017թ. Խորհրդին ներկայացված բողոքի վերաբերյալ հայտնել է հետևյալը.

«Գնումների մասին ՀՀ օրենսդրությամբ սահմանված կարգով Երևանի քաղաքապետարանի կողմից կազմակերպված «ԵԲ-ԳՀԱՊՁԲ-17/4» ծածկագրով գնման ընթացակարգին մասնակցած Ընկերության կողմից ներկայացված փաստաթղթերը գնահատելու ժամանակ գնահատող հանձնաժողովն արձանագրել է հետևյալ խախտումը. այն է՝ Ընկերության «Ֆինանսական միջոցներ» որակավորման չափանիշին վերաբերող հրավերով նախատեսված որակավորման պահանջի առկայության վերաբերյալ ՀՀ կառավարությանն առընթեր պետական եկամուտների կոմիտեի կողմից ներկայացված եզրակացության համաձայն՝ մասնակցի «Ֆինանսական միջոցներ» որակավորման չափանիշը չի համապատասխանել հրավերով սահմանված պահանջներին, մասնավորապես, նախորդող երեք հաշվետու տարիների համախառն եկամտի հանրագումարն եղել է զրո:

Բողոքում նշված Ընկերության պնդումների վերաբերյալ տեղեկացնում եմ.

Գնահատող հանձնաժողովի կողմից թույլ տրված տեխնիկական վրիպակի պատճառով 03.08.2017 թվականի թիվ 4 արձանագրությամբ Ընկերության հայտը գնահատվել է բավարար և Ընկերությունը 9-րդ չափաբաժնի մասով ճանաչվել է ընտրված մասնակից:

Համաձայն «Գնումների գործընթացի կազմակերպման մասին» ՀՀ կառավարության 526-Ն որոշմամբ հաստատված կարգի 26-րդ կետի 7-րդ ենթակետի՝ իրականացվել է գնահատող հանձնաժողովի արտահերթ նիստ և գնահատող հանձնաժողովի որոշմամբ էլեկտրոնային փոստով, ինչպես նաև armeps.am կայքի միջոցով ոչ ավտոմատ եղանակով ծանուցվել է Ընկերությանը՝ մեկ աշխատանքային օրվա ընթացքում շտկել նշված անհամապատասխանությունը:

Ընկերության կողմից սահմանված ժամկետում չի շտկվել առկա անհամապատասխանությունը, և համաձայն Կարգի 42-րդ կետի՝ գնահատող հանձնաժողովի կողմից 11.08.2017 թվականի նիստով հայտը գնահատվել է անբավարար ու մերժվել է:

Ինչ վերաբերում է Ընկերության այն դիտարկմանը, որ հայտը մերժելու վերաբերյալ տեղեկացվել է բանավոր և չի ներկայացվել գնահատող հանձնաժողովի թիվ 5 և թիվ 6 արձանագրությունները, տեղեկացնում եմ, որ ծանուցումներն Ընկերությանն իրականացվել են գնումների մասին ՀՀ օրենսդրությամբ սահմանված կարգով և կից ներկայացվում է արձանագրությունների ծանուցումը հավաստող էլ. կայքից արտատպված պատճենները:

Վերոգրյալով պայմանավորված գտնում եմ, որ գնահատող հանձնաժողովի կողմից կայացված որոշումը իրավաչափ է և խախտում առկա չէ»:

Խորհրդի նիստերին մասնակցում էր Պատվիրատուի լիազորված ներկայացուցիչ Նարինե Կիրակոսյանը:

3. ԳԲԽ-ԷՍ-2017/33 բողոքի քննության համար էական նշանակություն ունեցող փաստերը, Խորհրդի հիմնավորումները և եզրահանգումը.

Խորհուրդն ուսումնասիրել է «Ինվուդ» ՍՊԸ-ի կողմից 21.08.2017թ. Խորհրդին ներկայացված բողոքը և կից փաստաթղթերը, Պատվիրատուի 24.08.2017թ. թիվ 02/61-52538 գրությամբ ներկայացված դիրքորոշումը, «ԵԲ-ԳՀԱՊՁԲ-17/4» ծածկագրով գնանշման հարցման հրավերը (այսուհետ՝ նաև Հրավեր), «ԵԲ-ԳՀԱՊՁԲ-17/4» ծածկագրով գնանշման հարցման ընթացակարգի գնահատող հանձնաժողովի (այսուհետ՝ նաև Հանձնաժողով) 20.07.2017թ. նիստի թիվ 2, 27.07.2017թ. նիստի թիվ 3, 03.08.2017թ. նիստի թիվ 4, 09.08.2017թ. նիստի թիվ 5, և 11.08.2017թ. նիստի թիվ 6 արձանագրությունները, «Ինվուդ» ՍՊԸ-ի կողմից «ԵԲ-ԳՀԱՊՁԲ-17/4» ծածկագրով գնանշման հարցմանը մասնակցելու նպատակով ներկայացված հայտը, ՀՀ ԿԱ ՊԵԿ (այսուհետ՝ նաև Կոմիտե) կողմից տրամադրած եզրակացությունը, Կոմիտեի կողմից «Ինվուդ» ՍՊԸ-ին տրամադրած՝ ավելացված արժեքի հարկի հաշվարկը, Պատվիրատուի դիրքորոշումը և կարծիքը.

Երևանի հհ. 26, 70, 91, 114, 160 մանկապարտեզների համար գույքի ձեռքբերման նպատակով՝ Երևանի քաղաքապետարանի (այսուհետ՝ նաև Պատվիրատու) կողմից կազմակերպված «ԵԲ-ԳՀԱՊՁԲ-17/4» ծածկագրով գնման ընթացակարգին (այսուհետ՝ նաև Ընթացակարգ) մի շարք չափաբաժինների մասով մասնակցության հայտ է ներկայացրել նաև «Ինվուդ» ՍՊԸ-ն:

Հանձնաժողովի 27.07.2017թ. ժամը 11:30-ին կայացած նիստի թիվ 3 արձանագրության 3.1 կետի համաձայն՝ «Ինվուդ» ՍՊԸ-ն 9-րդ չափաբաժնի մասով ճանաչվել է առաջին տեղն

զբաղեցրած մասնակից՝ ներկայացնելով նշված չափաբաժնի համար նվազագույն գնային առաջարկը, որը կազմել է 2.599.200 ՀՀ դրամ:

Նույն արձանագրության 4.1 կետով Հանձնաժողովը՝ հիմք ընդունելով ՀՀ կառավարության 04.05.2017թ. N526-Ն որոշմամբ հաստատված «Գնումների գործընթացի կազմակերպման» կարգի 43-րդ կետի 3-րդ ենթակետը, որոշել է գնման ընթացակարգի բոլոր չափաբաժինների մասով առաջին տեղն զբաղեցրած մասնակիցների «Ֆինանսական միջոցներ» որակավորման չափանիշին վերաբերող՝ հրավերով նախատեսված որակավորման պահանջի առկայության վերաբերյալ 28.07.2017թ. հարցում ներկայացնել ՀՀ կառավարությանն առընթեր պետական եկամուտների կոմիտե:

Ի պատասխան հանձնաժողովի 28.07.2017թ. Կոմիտեին ներկայացված հարցմանը՝ վերջինս 01.08.2017թ. ներկայացրել է հարցման վերաբերյալ եզրակացություն, ըստ որի «Ինվուդ» ՍՊԸ-ի հայտը ներկայացվելուն նախորդող երեք հաշվետու տարիների համախառն եկամտի հանրագումարը կազմել է 0 (զրո) ՀՀ դրամ:

Հանձնաժողովը 03.08.2017թ. ժամը 11:45-ին կայացած նիստի թիվ 4 արձանագրության 1.1 կետով արձանագրել է, որ ՀՀ կառավարությանն առընթեր պետական եկամուտների կոմիտեի կողմից սահմանված ժամկետում ներկայացվել է եզրակացություն, համաձայն որի առաջին տեղն զբաղեցրած մասնակիցների «Ֆինանսական միջոցներ» որակավորման չափանիշը համապատասխանում է հրավերով սահմանված պահանջներին:

Նույն արձանագրության 3-րդ կետով Հանձնաժողովը որոշել է «Ինվուդ» ՍՊԸ-ն 9-րդ չափաբաժնի մասով ճանաչել ընտրված մասնակից:

Հանձնաժողովը 09.08.2017թ. ժամը 11:45-ին գումարել է արտահերթ նիստ, որի մասին կազմված թիվ 5 արձանագրության 1.1 կետով արձանագրել է, որ տեխնիկական վրիպակի արդյունքում մասնակիցներից «Ինվուդ» ՍՊԸ-ն 9-րդ չափաբաժնի մասով ճանաչվել ընտրված մասնակից, մինչդեռ մասնակցի «Ֆինանսական միջոցներ» որակավորման չափանիշին վերաբերող հրավերով նախատեսված որակավորման պահանջի առկայության վերաբերյալ ՀՀ կառավարությանն առընթեր պետական եկամուտների կոմիտե ներկայացված հարցման վերաբերյալ եզրակացության համաձայն՝ մասնակցի «Ֆինանսական միջոցներ» որակավորման չափանիշը չի համապատասխանում հրավերի պահանջներին:

Հիմք ընդունելով ՀՀ կառավարության 04.05.2017թ. N526-Ն որոշմամբ հաստատված «Գնումների գործընթացի կազմակերպման» կարգի 47-րդ կետը՝ Հանձնաժողովը որոշել է

ծանուցել «Ինվուդ» ՍՊԸ-ին մեկ աշխատանքային օրվա ընթացքում շտկել արձանագրված անհամապատասխանությունը:

Հանձնաժողովը 11.08.2017թ. ժամը 11:45-ին կայացած նիստի թիվ 6 արձանագրության 1.1 կետով արձանագրել է, որ «ԵԲ-ԳՀԱՊՁԲ-17/4» ծածկագրով գնման ընթացակարգի շրջանակներում «Ինվուդ» ՍՊԸ-ի «Ֆինանսական միջոցներ» որակավորման չափանիշին վերաբերող անհամապատասխանությունը հրավերով սահմանված ժամկետում չի շտկվել, և նույն արձանագրության 1.2 կետով որոշել է, որ «Ինվուդ» ՍՊԸ-ի հայտը ենթակա է մերժման:

«Ինվուդ» ՍՊԸ-ն Խորհրդին ներկայացրած բողոքով հայտնել է, որ Երևանի քաղաքապետարանի կողմից Ընկերության հայտը մերժելու վերաբերյալ տեղեկացել է բանավոր՝ չստանալով Ընթացակարգի գնահատող հանձնաժողովի հայտը մերժելու մասին արձանագրությունը և գտնում է, որ Ընկերության կողմից ներկայացված հայտը համապատասխանել է Հրավերի պահանջներին:

Բողոքի քննության նպատակով 04.09.2017թ. տեղի ունեցած նիստի ժամանակ Պատվիրատուի ներկայացուցիչը ընդունեց այն փաստը, որ հանձնաժողովի կողմից թույլ տրված վրիպակի արդյունքում «Ինվուդ» ՍՊԸ-ն 9-րդ չափաբաժնի մասով ճանաչվել է ընտրված մասնակից, մինչդեռ Ընկերության «Ֆինանսական միջոցներ» որակավորման չափանիշին վերաբերող հրավերով նախատեսված որակավորման պահանջի առկայության վերաբերյալ Կոմիտեի եզրակացության համաձայն՝ նշված որակավորման չափանիշը չի համապատասխանել հրավերի պահանջներին, հետևաբար Հանձնաժողովը՝ շտկելով իր կողմից թույլ տրված վրիպումը, 09.08.2017թ. գումարել է արտահերթ նիստ և նշված նիստի արձանագրության 1.1 կետով արձանագրել է Ընկերության հայտում առկա անհամապատասխանությունը՝ առաջարկելով Ընկերությանը մեկ աշխատանքային օրվա ընթացքում շտկել այն:

Միաժամանակ, Ընկերության այն պնդմանը, որ հայտը մերժելու վերաբերյալ վերջինս տեղեկացվել է բանավոր և չի ստացել Ընկերության հայտը մերժելու մասին հանձնաժողովի համապատասխան արձանագրությունները, Պատվիրատուի ներկայացուցիչը նշեց, որ ծանուցումները Ընկերությանն իրականացվել են գնումների մասին ՀՀ օրենսդրությամբ սահմանված կարգով, և Խորհրդին ներկայացրեց նշված արձանագրությունների ծանուցումը հավաստող՝ էլեկտրոնային կայքից արտատպված պատճենները:

«Գնումների մասին» ՀՀ օրենքի (այսուհետ՝ նաև Օրենք) 6-րդ հոդվածի 3-րդ մասի համաձայն՝ մասնակիցը պետք է բավարարի հրավերով սահմանված որակավորման չափանիշները: Նույն մասի 4-րդ կետի համաձայն՝ մասնակիցը պետք է ունենա

պայմանագրով նախատեսված պարտավորությունների կատարման համար հրավերով պահանջվող ֆինանսական միջոցներ:

ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի (այսուհետ՝ Կարգ)՝

• 47-րդ կետի համաձայն՝ առաջին տեղն զբաղեցրած մասնակցի կողմից փաստաթղթերն ամբողջական չներկայացվելու, ինչպես նաև ներկայացված՝ ներառյալ կոմիտեի կողմից տրամադրված որակավորման չափանիշները հիմնավորող՝ հրավերով նախատեսված փաստաթղթերի, իսկ ապրանքների գնման դեպքում նաև նույն կարգի 32-րդ կետի 1-ին ենթակետի «գ» պարբերությամբ նախատեսված փաստաթղթի գնահատման արդյունքում հրավերի պահանջների նկատմամբ անհամապատասխանություններ արձանագրվելու դեպքում հանձնաժողովի քարտուղարը նույն օրն էլեկտրոնային եղանակով ծանուցում է առաջին տեղն զբաղեցրած մասնակցին՝ առաջարկելով մեկ աշխատանքային օրվա ընթացքում շտկել անհամապատասխանությունը:

• 48-րդ կետի համաձայն՝ առաջին տեղն զբաղեցրած մասնակցի կողմից արձանագրված անհամապատասխանությունը սահմանված ժամկետում՝

1) շտկելու դեպքում հայտը գնահատվում է բավարար և առաջին տեղն զբաղեցրած մասնակիցը հայտարարվում է ընտրված մասնակից:

2) չշտկելու դեպքում հանձնաժողովի որոշմամբ հայտը մերժվում է, և փաստաթղթեր ներկայացնելու պահանջ է ներկայացվում հաջորդաբար տեղ զբաղեցրած մասնակցին:

• 63-րդ կետի համաձայն՝ մասնակիցների՝ օրենքի 6-րդ հոդվածի 3-րդ մասի 4-րդ կետով նախատեսված՝ «Ֆինանսական միջոցներ» չափանիշը գնահատվում է հետևյալ կարգով՝ հրավերով պահանջվում է, որ Հայաստանի Հանրապետության ռեզիդենտ հանդիսացող մասնակիցը, բացառությամբ անհատ ձեռնարկատեր չհանդիսացող ֆիզիկական անձի, հայտով ներկայացնում է հայտարարություն այն մասին, որ իր կողմից հայտը ներկայացվելուն նախորդող՝

ա. երեք հաշվետու տարիների համախառն եկամտի հանրագումարը պակաս չէ ներկայացված գնային առաջարկից,

բ. հաշվետու տարվա ընթացքում պարտավորությունների հաշվեկշռային արժեքը չի գերազանցել ակտիվների հաշվեկշռային արժեքը:

«ԵԲ-ԳՀԱՊԶԲ-17/4» ծածկագրով գնանշման հարցման ընթացակարգի հրավերի 2.5 կետի՝ 3-րդ ենթակետի «ա» պարբերության համաձայն՝ «Ֆինանսական միջոցներ» որակավորման չափանիշը սահմանվում և գնահատվում է հետևյալ կարգով՝ Հայաստանի

Հանրապետության ռեզիդենտ հանդիսացող մասնակցի, բացառությամբ անհատ ձեռնարկատեր չհանդիսացող ֆիզիկական անձի, հայտը ներկայացնելուն նախորդող երեք հաշվետու տարիների համախառն եկամտի հանրագումարը չպետք է պակաս լինի նույն ընթացակարգի շրջանակում մասնակցի ներկայացրած գնային առաջարկից:

Որպես Հրավերով նախատեսված «ֆինանսական միջոցներ» չափանիշը հիմնավորող փաստաթղթի շտկված փաստաթուղթ Ընկերությունը Խորհրդին է ներկայացրել ՀՀ ԿԱ ՊԵԿ ՀՎՍՎ թիվ 5-րդ բաժնի կողմից հաստատված 2017թ. 2-րդ եռամսյակի ավելացված արժեքի հարկի ճշգրտված հաշվարկը, որի համաձայն Ընկերության ընդամենը շրջանառությունը (համախառն եկամտի ծավալը) նշված հաշվետու ժամանակահատվածում կազմել է 11.382.500 ՀՀ դրամ:

«Հաշվապահական հաշվառման մասին» ՀՀ օրենքի 22-րդ հոդվածի 2-րդ մասի համաձայն՝ հաշվետու տարին տվյալ տարվա հունվարի 1-ից մինչև դեկտեմբերի 31-ը ներառյալ ընկած ժամանակաշրջանն է:

Այսինքն, ՀՀ ԿԱ ՊԵԿ ՀՎՍՎ թիվ 5-րդ բաժնի կողմից հաստատված 2017թ. 2-րդ եռամսյակի ավելացված արժեքի հարկի ճշգրտված հաշվարկը, որի համաձայն Ընկերության ընդամենը շրջանառությունը (համախառն եկամտի ծավալը) նշված հաշվետու ժամանակահատվածում կազմել է 11.382.500 ՀՀ դրամ, չի ընդգրկում հայտը ներկայացնելուն նախորդող երեք հաշվետու տարիները:

Խորհուրդն արձանագրում է, որ «Ինվուդ» ՍՊԸ-ի հայտը ներկայացվելուն նախորդող երեք հաշվետու տարիների համախառն եկամտի հանրագումարը կազմել է 0 (զրո) ՀՀ դրամ, ինչը չի համապատասխանում «ԵՔ-ԳՀԱՊՁԲ-17/4» ծածկագրով գնման ընթացակարգի հրավերով՝ «ֆինանսական միջոցներ» որակավորման չափանիշի գնահատման համար սահմանված պահանջին:

Խորհուրդն արձանագրում է նաև, որ Ընկերության հայտը մերժելու մասին հանձնաժողովի համապատասխան արձանագրությունները Պատվիրատուի կողմից գնումների մասին ՀՀ օրենսդրությամբ սահմանված ժամկետում և կարգով ծանուցվել են Ընկերությանը:

Օրենքի 34-րդ հոդվածի՝

- 1-ին մասի համաձայն՝ հայտերը գնահատվում են հրավերով սահմանված կարգով: Բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:

• 2-րդ մասի 1-ին կետի համաձայն՝ առաջին տեղը զբաղեցրած մասնակիցը որոշվում է՝ բավարար գնահատված հայտեր ներկայացրած մասնակիցների թվից՝ նվազագույն գնային առաջարկ ներկայացրած մասնակցին նախապատվություն տալու սկզբունքով:

• 9-րդ մասի համաձայն՝ հայտերի գնահատման նիստի ավարտին հաջորդող առաջին աշխատանքային օրը նիստի արձանագրությունը հրապարակվում է տեղեկագրում:

Այսպիսով, Խորհուրդը գտնում է, որ գանահատող հանձնաժողովը՝ անբավարար գնահատելով «Ինվուդ» ՍՊԸ-ի հայտը՝ գործել է իրավաչափ:

Ելնելով վերոգրյալից՝ ՀՀ գնումների բողոքարկման խորհուրդը

Ո Ր Ո Շ Ե Ց

«Ինվուդ» ՍՊԸ-ի կողմից 21.08.2017թ. ներկայացրած բողոքը մերժել:

ՀՀ գնումների բողոքարկման խորհրդի որոշումն իրավապարտադիր է:

ՀՀ գնումների բողոքարկման խորհրդի որոշումը կարող է բողոքարկվել դատական կարգով:

ՀՀ գնումների բողոքարկման

խորհրդի անդամ՝



ԷՄԻԼ ՍԱՐԳՍՅԱՆ